

札

樸

札樸第十目錄

滇游續筆

建極

鐵柱

山水脉絡

羅平山

杉木和

崇聖寺

感通寺

賤

哨

檜

火把節

農人耕田

煉爐

濮人

雲龍擺夷

壞

蠻韉

蹋歌

鑊鍋

襖

猓夷布

宕宕

貝

白酒

鹽獅

耳塊

豆豉沈

蘭

菌

赤藤

麻栗

醉李

石竹

娑樹

構漿

毒草

芋

打不死

土瓜

蝴蝶花

野薑

鸚哥花

麻竹

橄欖

雉

綠鳩

雞

山喜鵲

鐵連甲

很虎

飛鼠

風獸

豪豬

脆蛇

青竹剝

斷腸草

毛辣子

鼠

蟻

彭蜆

公魚

翡翠

銅鼓

宋寧州刺史蘇君碑

南詔德化碑

郵亭題壁詩

惡俗

用刑

札樸第十目錄終

札樸第十

曲阜 桂馥 未谷撰

滇游續筆

建極

南詔傳坦綽酋龍僭稱皇帝建元建極自號大禮疑理之誤
國案事在宣宗旣崩之後懿宗卽位之初當是咸通元年
今太和崇聖寺大鐘有建極年號

鐵柱

鐵柱在彌渡之西高七尺五寸徑二尺八寸有文曰維
建極十三年歲次壬辰四月庚子朔十四日癸丑建立

土人建廟塑男女二像號稱馳靈景帝大黑天神案南
詔佑世隆僞諡景莊故稱景帝世以此柱爲諸葛武侯
造滇人傳會多類此

山水脉絡

蒙化張錦蘊云滇南諸山以麗江劍川之老君山爲鼻
祖其中拙自觀音山至佛光寨綿延於浪穹鄧川海東
趙州之左至定西嶺分一支於西爲蒙化其東至定邊
西界止其西則綿亘環衍由南而東爲無量山直奔景
東隨瀾滄江派衍爲南夷諸山竟趨南海由是西嶺之
東則爲白崖雲南縣之北山至大波郎轉安南關至普

溯則爲沙橋呂合楚雄之南山又東至廣通舍資則北
轉爲祿豐腴草鋪一派之北山而姚安武定則北山之
支也其南一支出新興由河西通海至臨安沅江一帶
以遞交趾而至於海東一支則至澂江北轉爲蛇山南
向而結省城下曲靖出東川以遞貴州今老君山北流
爲金沙江若鶴慶賓川楚雄姚安武定所屬之水皆歸
之老君山南流爲瀾滄江若劍川浪穹鄧川雲龍趙州
雲南蒙化景東祿豐臨安沅江所屬之水皆歸之是則
滇山發源於老君山金沙瀾滄兩水夾流燦若鬚眉山
水具在可按而稽焉

大理府志老君山爲鼻祖觀音山爲咽喉定西嶺爲腹
心瀾滄金沙爲四肢之脉絡

通志山原起於西藏枯爾坤兩江夾持至老君山爲通
省衆山之祖惟永北一府在金沙江外爲其左臂永昌
順寧二府在瀾滄江外爲其右臂老君東入鶴慶西分
大理正脊中出爲定西嶺爲碧藏山折而北至羅次之
玉龍山復折而南至昆陽之鐵爐關又東北爲岷嶠山
又北爲邵甸折而西南爲陞山紆曲三疊旋轉如環乃
建省治焉金沙江北折而歸四川瀾滄江南匯而入車
里正東之水皆滙八達河入廣西正西之水皆歸潞江

入阿瓦而禮社一江發趙州至蒙化歷楚雄而斜界其間故分爲東西兩迤此則雲南之大較矣

羅平山

浪穹縣有羅平山余自鄧川往雲龍越山而過自麓至顛屈曲回轉二十五里案卽水經注所傳弔鳥山也李彤四部云弔鳥山俗傳鳳死於上每歲七月至九月羣鳥常來集其處是也今山下有邨名鳳羽俗傳鳳墮羽於此

杉木和

保山縣有巡檢駐防之地曰杉木和此六詔舊名也南

詔傳云夷語山坡陀爲和案開元末南詔逐河蠻取大和城貞元十年韋皋敗吐蕃克峨和城施浪詔居苴和城施各皮據石和城西爨有龍和城南詔碑石和子臣遷和皆羌夷稱和之證

點蒼山有草類芹紫莖辛香可食呼爲高和菜亦南詔舊名

崇聖寺

太和城北崇聖寺開元元年南詔盛羅皮所造外起三塔長慶二年晟豐佑更修之工倍於初咸通十二年佑世隆鑄大士像高丈餘又鑄大鐘上有諸佛像并建極

紀年今俱存

感通寺

太和城南感通寺本名蕩山寺南詔隆舜重修因改名寺有楊升庵畫像其轉注古音畧成於寺中官路旁有明人書靈鷲兩大字刻石

賧

余攝鄧川州事卽鄧賧詔故地通鑑沈攸之賧罰羣蠻太甚注引何承天纂文曰賧蠻夷贖罪貨也通鑑又云益州大度獠恃險驕恣陳顯達爲刺史遣使責其租賧注云夷人以財贖罪曰賧後漢書南蠻傳殺人者得以

俛錢贖死注引纂文作俛

哨

雲南屯戍多稱曰哨北人吹竹笛曰哨字當作簫說文
簫吹笛也七肖切案卽洛陽亭長所吹郭注穆天子傳
簫今戟吏所吹者馥謂屯戍吹簫相警俗名曰哨

檜

永平山中人築室不用甍瓦土墜但橫木柴絜爲四壁
上覆木片謂之苫片與豕所居無異馥謂卽古之檜也
家語問禮篇夏則居檜巢注云有柴謂檜在樹曰巢

火把節

六月二十五日夕家家樹火於門外謂之火把節蓋祀
鄧賧詔夫婦也五詔於是日同爲南詔焚死鄧賧詔妻
慈善夫人又畏逼死土人哀之故歲祀至今不絕鄧川
州城東有渠潭潭上有故城遺趾卽鄧賧所居今名德
媛城

農人耕田

大理耕者以水牛負犁一人牽牛一人騎犁轅一人推
犁案南詔傳犁田以一牛三夫前挽中壓後驅然則今
之耕者猶是蠻法也

爇爐

玉篇燼字云燎除旁草也燼字云燒也案宋書羊元保傳燼山封水保爲家利又云凡是山澤先常燼燼種養竹木雜果爲林馥案滇南歲焚山林卽燼燼也

濮人

周書王會卜人以丹沙注云西南之蠻蓋濮人也通典有尾濮木縣濮文面濮折腰濮赤口濮黑契濮案書牧誓庸濮傳云在江漢之南文十六年左傳麋人率百濮聚於邕將伐楚釋例云建寧郡南有濮夷無君長總統各以邑落自聚故稱百濮也昭元年傳吳濮有釁注云吳在東濮在南今建寧郡南有濮夷九年傳以夷濮西

田益之注云夷田在濮水西者傳又云巴濮楚鄧吾南
土也注云建寧郡南有濮夷地十七年傳楚子爲舟師
以伐濮注云南夷也

唐書南蠻傳三濮者在雲南徼外千五百里有文面
濮俗鏤面以青涅之赤口濮裸身而折齒劉其脣使
赤黑燠濮山居如人以幅布爲裙貫而繫之丈夫衣
穀皮

明董難

字西羽
太和人

云諸濮地與哀牢相接案哀牢卽今

永昌濮人卽今順寧所名蒲蠻者是也濮與蒲音相
近譌爲蒲耳

雲龍獵夷

雲龍獵夷有羅平山爲閒隔

卽水經注之弔鳥山

初與外人不通

有鹽井無文字以皮爲衣以星辰辨四時以草木紀年
歲有六年一花十二年一實者

壞

滇人謂死曰壞其父母死亦曰壞或聞而大怪之余曰
古有此言釋名諸侯曰薨薨壞之聲也曲禮天子死曰
崩諸侯曰薨鄭注自上顛壞曰崩薨顛壞之聲何休公
羊解詁崩大毀壞之辭薨小毀壞之辭

蠻韓

唐人詩柘枝舞罷忽成悲便脫蠻鞞入絳帷案蠻鞞蠻
夷舞者所著韋皋作南詔奉聖樂其舞人服畫皮鞞是
也說文躡舞履也或從革周禮春官鞞鞞氏注云鞞讀
如屨也鞞鞞四夷舞者所屣也今時倡蹋鼓沓行者自
有屣馥謂蠻鞞鞞鞞之類也今雲南人以麂皮作半截
鞞開其前面旣著而後結之卽蠻鞞遺製

蹋歌

夷俗男女相會一人吹笛一人吹蘆笙數十人環繞蹋
地而歌謂之蹋歌案子虛賦文成顛歌注云益州顛池
縣其人能西南夷歌顛與滇同馥謂蹋歌真西南夷歌

也劉昫謂今之竽笙並以木代匏無復八音蘆笙用匏古音未亾也

鑊鍋

行者腰繫銅器就水采薪煮飯謂之鑊鍋案通典獠俗鑄銅爲器大口寬腹名曰銅鑊旣薄且輕易於熟食是也

襁

皇氏論語義疏襁者以竹爲之或云以布爲之今蠻夷猶以布帨裹兒負之背也馥案雲南蠻婦以布裹兒背上或居或行兒不離背無妨操作勝於懷抱未見用竹

者

獬夷布

漢時蠻夷以布爲賦說文賓南蠻賦也喙南郡蠻夷賓布是也今獬夷所織品目甚多紋理精好粗者如縹細者如錦羊毛所績不亞羽紗後漢西南夷傳哀牢夷知染采文繡屬氍毹帛疊闌干細布織成文章如綾錦

宕宕

滇人呼几案牀榻橫木曰宕宕馥謂當爲枕枕一切經音義枕聲類作軌車下橫木也今車牀及梯輦橫木皆曰枕是也淮南原道訓橫四維而含陰陽高注橫讀車

枕之枕集韻牖下云牀橫枕

貝

海藥云貝子雲南極多用爲錢貨易

白酒

糯米爲甜酒俗呼白酒案卽稻醴也內則有稻醴黍醴
梁醴哀十一年左傳進稻醴釋文云以稻米爲醴酒

鹽獅

雲龍煮鹽其形作獅子者品最上州牧王君鳳文見惠
數十枚余謂卽左傳之形鹽也

耳塊

大理人作稻餅若蝶翅呼爲耳塊詢其名義云形似獸之兩耳馥告之曰當爲餌饋方言餌或謂之資資卽稻餅北人謂之資槩普八切其圓者謂之資團重陽所食謂之資饒集韻饒饋餌名屑米和蜜烝之

資槩俗作糍粑滇人呼餅曰粑粑

豆豉沈

雲南人取豬血雜以肉骨同鹽豉作醢謂之豆豉沈余頗嗜此因考其字當爲盥說文盥血醢也從血肸聲禮記有盥醢以牛乾脯梁籒鹽酒也馥謂豉可代梁籒

永昌人以萆茭爲豆豉南方草木狀茆醬萆茭也寔

宇記益州蒔醬如今之大華茛

蘭

余訪蘭於滇不可徧知也得卅餘種就土俗名目次而記之其開於春者十二曰春建葉長不折花香遠布出通海曰春綠極媚秀出大理蒙化曰莧蘭色淺碧葉如箭出宜良曰獨占春花最大曰銅紫蘭花小而繁色如紫銅出蒙化順寧曰幽谷花紅葉細香最久楊升庵爲賦采蘭引出廣通曰雙飛燕每莖兩苞似雪蘭而大紫表白裏亦有一花者謂之孤飛曰石蘭花大無香曰櫻葉一莖中抽花最小葉大如掌曰赤舌花色如碧玉大

似虎頭蘭曰紫線葉長二三尺花色澹白瓣有紐紋出永昌夏開者有六曰夏蕙花繁葉厚處處有之曰箭幹花紫迤西多有曰朶朶香出昆明曰白蓮瓣花稀葉疎曰綠蓮瓣葉長出迤西曰絳蘭葉短花赤普汧沅江熱地所生也秋開者有七曰秋茝花碧處處有曰麻蓮瓣出蒙化曰露蘭莖短出廣南曰大朱蘭葉廣二寸幹修三尺一幹數十花色紫生順寧深箐中曰菊伴花紫瓣長出雲南曲靖二府曰崖蘭生山谷中花藏葉底采花陰乾主婦人難產冬開者有十曰寒友花小葉密出富民曰朱沙綠瓣赤舌香最烈出蒙化景東深山石壁上曰

雪蘭色正白舌赤出大理順寧出寧州者不甚白而香
清舌碧又一種也曰綠韎綠曰紫韎綠曰馬尾色黃瓣
不分張曰火燒蘭葉長莖短並出順寧又一種出雲州
莖長而花香曰虎頭花最大品亦最下順寧又一種花
黃生深箐枯木上五月開曰淨瓶似瓜生石上兩葉一
大一小廣寸許花如雪蘭而小其四時開者曰素心花
小葉纖出昆明又有風蘭根不著土或憑木石或懸戶
牖皆生出普洱開化又有鷺絲蝴蝶葉有節花形如鷺
如蝶蘭之別子也山川之氣不能無所鍾旣不鍾於人
必鍾於草木故滇南四時之花多可愛玩然旣無人矣

雖有名花草誰爲采擷誰爲品目終衰謝於荒山窮谷間耳此蘭被崖綴澗自樂其天若無望世人之知者是則蘭也已矣

菌

滇南多菌今據俗名記之青者曰青頭黃者曰蠟栗又曰苡麩又曰雞油大徑尺者曰老虎赤者曰胭脂白者曰白參又曰茅草黑者曰牛肝大而香者曰雞變小而叢生者曰一窩雞生於冬者曰冬菌生於松根者曰松菌生於柳根者曰柳菌生於木上者曰樹窩叢生無蓋者曰埽帚縐蓋者曰羊肚生於糞者曰豬矢有毒者曰

撐脚傘莊子朝菌不知晦朔蔡氏毛詩名物解引作雞
菌北方謂之雞腿蘑菇卽雞髮也

赤藤

白傳蠻子朝詩云清平官持赤藤杖韓吏部赤藤杖歌
云赤藤爲杖世未窺臺郎始攜自滇池又云共傳滇神
出水獻赤龍拔鬚血淋漓余來滇訪藤所生處無一人
知者噫

麻栗

木生路側結實似栗土人呼麻栗余謂麻蓋茅聲之轉
廣韻梔細栗楚呼茅栗陸璣草木疏敘栗云又有茅栗

醉李

蒙化諸山中有木大者合抱屈曲不材結實似李小如
楞棗六月熟土人呼醉李余謂卽欂李

石竹

順寧山石閒有草一本數十莖莖多節葉似竹葉四五
月開花純黃亦有紫白二色者土人謂之石竹案卽石
斛也移植樹上亦生

婆樹

詩隱有六駁毛傳以駁爲獸名陸璣疏駁馬木名梓榆
也其樹皮青白駁皴遙視似駁馬故謂之駁馬下章山

有苞棣隰有樹槎皆山隰之木相配不宜云獸又云檀木與槩迷相似又似駁馬駁馬梓榆故里語曰斫檀不諦得槩迷槩迷尙可得駁馬

元和郡縣志賀蘭山有樹木青白望如駁馬北人呼駁爲賀蘭馥案北方無此木未得目驗及官雲南到處有之土人音譌呼爲婆樹

構漿

滇人呼穀樹爲構漿以其折枝則漿出也陶注本草云穀音構西陽雜俎穀田久廢必生構葉有瓣曰楮無曰構

毒草

毒草滇南極多余在順寧多有被怨家毒害告官者案牘累累案論衡言毒篇草木有巴豆治葛食之殺人夫毒太陽之熱氣也天下萬物含太陽氣而生者皆有毒螫故治在東南巴在西南馥謂滇位西南故多毒草

芋

滇芋熟早而味美藪可作羹居人賴以充糧案廣志百子芋出葉榆縣魁芋無旁子生永昌是滇芋自昔傳佳品也

打不死

滇中有草似馬齒莧而葉尖莖青盛於冬拔之不死折而棄之得土復生俗名打不死案卽爾雅卷施草拔心不死也郭以爲宿莽故盛於冬

土瓜

土瓜形似蘆菔之扁者色正白食之脆美案卽爾雅黃菟瓜音譌爲土瓜土瓜乃王瓜色赤不中噉

蝴蝶花

繡毬花周圍先開其瓣五出酷似小白蝶俗呼蝴蝶花中心別有數十藥小如粟米

野薑

野蘆根似蘆葉似蕉葉花出葉旁紫紅色三四月開卽藥中之狗脊

鸚哥花

永昌順寧有木高數丈葉如桐多刺花色似紅蕉土人謂之鸚哥花以其似鸚鵡嘴案卽刺桐也亦謂之蘋桐南方草木狀蘋桐花連枝萼皆深紅之極者俗呼貞桐花蘋音之譌是也折其枝插地卽生

麻竹

永昌順寧山谷有竹中實葉大節最疏土人破爲絲繩作履謂之麻竹余案卽濮竹漢書哀牢夷傳其竹節相

去一尺名濮竹

橄欖

蒙化順寧山中有小木高數尺葉如青棠葉結實似山
檣淡綠色有回味微酢土人謂之橄欖案玉篇橄欖果
本出交趾三輔黃圖漢武帝破南越得橄欖百餘本卽
此是也又有橢圓如雞子者色青謂之青果其木頗大
雉

雉白質五采者滇人謂之箐雞青質五采者謂之翟雞
馥案白質卽顰也褱衣畫之青質卽搖也掄狄畫之馴
者蓄于庭喜食花

綠鳩

趙州人家養一綠鳩似斑鳩而無繡項色近鸚鵡不鮮
明戴祚西征記云祚至雍丘始見鳩大小如鳩色似鸚
鵡馥案鳩無綠色戴所見卽綠鳩與

雞

順寧準提寺僧養一獬夷雞鳴應更鼓五更無差蓋童
雞也與牝交過鳴卽不準中甸人家牝雞孚十二子皆
雄鳴應十二時後殺其一餘不復鳴

獬夷地方有野雞小於家雞能飛聲短捕其雄與家
雞交抱出雛體大而聲清呼爲獬夷雞其距長寸許

山喜鵲

小鳥大於雀形似鵲漢人謂之山喜鵲案卽韃鵲也爾雅鵲小鵲說文鵲韃鵲山鵲知來事鳥也俗言乾鵲噪行人至乾韃聲近而譌

鐵連甲

永平有鳥黑色長尾大如啄木喜栖柳樹侵晨先衆鳥鳴旣栖猶鳴極可聽見鳥必逐而擊之鳥哀號遁去土人呼爲鐵連甲亦曰鐵連枷又曰鐵翅膀案爾雅翼云許解淮南子鳥力勝日而服於騅禮引爾雅謂之鵲鵲秦人謂之祀祝鵲時晨鳴人舍者鴻鳥皆畏之當作鴻

許說則是今雅鳴爾郭氏解鵙鵙亦云小黑鳥鳴自呼
江東名爲鳥鳴今鳥鳴小於鳥而能逐鳥俗言鳥之舅
也馥案此卽俗呼批夾是也高誘淮南注引爾雅作裨
笠荆楚歲時記言四月有鳥如鳥鴻先雞而鳴聲云加
格加格民候此鳥鳴則入田以爲催人犁格也玉篇鳥
鳴似鳩有冠今鐵連甲無冠其繞喙長毛似鵙鵙鄭氏
通志有鳥似鸛鵒無冠而長尾多在山寺廚檻間今謂
之鳥鳴

很虎

順寧有鳥夜鳴其聲骨鹿蒼黑色大如拳狸首有角俗

呼很虎卽兔鴟也釋鳥萑老鴟郭注木兔也似鴟鵂而
小兔頭有角毛脚夜飛好食雞

飛鼠

飛鼠出麗江大理諸府大者長三尺許尾如狐尾唐書
南蠻傳樸子蠻善用竹弓射飛鼠無不中或曰天鼠吐
蕃傳天鼠之皮可爲裘是也本名鸞說文鸞鼠形飛走
且乳之鳥也今人取其皮已婦人難產

風獸

臨安有風獸似胡獠色黃肉翅伏樹上不飲不食但向
風吸氣耳

豪豬

永昌順寧多豪豬能發豪射人或取其豪代箸遇毒輒作聲滇俗慣下毒惟此物能拒之

脆蛇

傳玄神蛇銘嘉茲靈蛇斷而能續今順寧有小蛇見人則自斷數節人去復成完體俗謂之脆蛇主療骨傷

青竹剝

順寧綠蛇細而長有毒善逐人其行如飛擊以木不中惟竹之單節者能斃之

斷腸草

順寧有蟲名斷腸草馬誤食則腸斷而斃形如枯草長三四寸六足前兩足能直出相並在草木上終日不動驅之不去翦其首出藍汁亦不仆汁盡乃死

毛辣子

毛蟲螫人者俗呼毛辣子案爾雅翼云載蟲背有毒毛能螫人俗呼楊癩蟲說文楚人謂藥毒曰痛癩音如辛辣之辣此卽爾雅蝮毛蠹陶注本草蛄蜥蝮蟲也其背毛螫人陳藏器云虵蟲好在果樹上大小如蠶身面背上有五色斑文毛有毒能螫人

鼠

余官鄧川時有疫疾名曰羊子傳染已二十餘年初起於鶴慶自北而南次及浪穹鄧川賓川太和趙州蒙化死者數萬人矣凡有鼠出穴死者室中人皆病或卽時死或閱日死延至七日卽不死其疾皮膚起皰割之有白漿或成羊毛余謂此水沴也故起於北而漸於南鼠穴蟲屬子水位故先感地氣而死人七日不死者陽勝水不能克也嘉慶元年抱母地鼠皆出穴俗傳戒火或有廢炊寒食者旣而大水漂沒廬舍此亦水沴故有鼠祥也

蟻

耿馬地名有大蟻結穴樹頭夷人食之味酸如酢

彭蠡

通海有蟹大如杏右螯特強案卽彭蠡也古今注彭蠡
其有螯偏大者名擁劍集韻彭蠡似蟹而小或作蠡

公魚

吳才老謂滇語呼江爲公故名江魚爲公魚案公當爲
工江從工得聲也西洱河所出六七寸之小魚今猶呼
工魚

翡翠

後漢書班固傳翡翠火齊注引異物志釋爲翡翠鳥馥

案翡翠翠與火齊並言乃石之似玉者所謂翡翠屑金也今緬甸出此石大者重五六百斤小者如拳剖之白如雪青如翠美者價值千金

銅鼓

銅鼓形如坐墩中空無底面多花紋無款識雲南四川廣東多有康熙中或得一面吾鄉趙秋谷贊善爲賦諸葛銅鼓歌讀其詩皆相傳臆度之詞無武侯實據後漢書馬援傳於交趾得駱越銅鼓林邑記曰南盧容浦通銅鼓外越銅鼓卽駱越也有銅鼓因得名馬援取其鼓以鑄銅馬虞喜志林建武二十四年南康獻銅鼓有銘

此又在諸葛之前矣晉書食貨志廣州夷人寶貴銅鼓
又載記云赫連勃勃鑄銅爲大鼓以黃金飾之大周樂
正云銅鼓鑄銅爲之虛其一面覆而擊其上南蠻南天
竺類皆如此嶺南豪家有大者廣尺餘陳書歐陽頠傳
云蘭欽南征夷獠獻大銅鼓累代所無嶺表錄異云蠻
夷之樂有銅鼓焉形如腰鼓而一頭有面圓一尺許面
與身連全用銅鑄其身徧有蟲魚花草之狀通體均勻
厚二分以來鑪鑄之妙實爲奇巧擊之響亮不下鳴鼙
南蠻酋首之家皆有此鼓也唐書云東謝蠻譙聚則擊
銅鼓以爲樂有功勞者以銅鼓賞之玉海云乾德四年

南蠻進銅鼓景德元年象州貢銅鼓高一尺八寸闊二尺五寸旁有四耳銜環鏤人騎花蛤椎之有聲又嶺表錄異云僖宗時高州鄉野牧兒聞田中蛤鳴欲捕之蛤躍入穴中掘取得一銅鼓其上隱起多鑄蛙黽之狀據傳記所載蠻夷各有銅鼓無一語及諸葛者不審贊善何自云爾也

朱氏

彝尊

銅鼓跋云伏波將軍平交趾諸葛丞相渡

瀘始鑄銅爲鼓蜀則凡鼓悉稱孔明所遺苗民得此雄視一方馥按銅鼓皆蠻夷自鑄諸葛無此舉伏波毀其鼓以鑄銅馬未聞鑄鼓

翁郡伯元圻云銅鼓一人擊一人以瓦器從後面收其音而縱送之其音有吉凶之別蠻夷皆能審辨吉者爭買凶者棄而不顧矣

宋寧州刺史縣君碑

君諱龍顏字仕德建寧同樂□□□□□□□□
之玄胄□□祝融之眇胤也清源流而不滯深根固而不傾夏后之盛敷陳五教勲隆九土純化□□□□
功播於万祀故乃耀輝西岳□□郢楚子文銘德於春秋斑朗紹繼於季葉陽九運否蟬蛻河東逍遙中原斑彪刪定漢記斑固述修道訓爰暨漢末菜邑於縣因氏

族焉姻婭媾於公族振纓蕃乎王室迺祖肅魏尙書僕射河南尹位□九例舒翊中朝遷運庸蜀流薄南入樹安九世千柯繁茂萬葉雲興卿望標於四姓邈冠顯於上京瑛豪繼體於茲而美祖晉寧建寧二郡太守龍驤將軍寧州刺史考龍驤輔國將軍八郡監軍晉寧建寧二郡太守追諡寧州刺史邛都縣侯金紫累跡朱黻充庭君承尙書之玄孫監軍之令子也容貍瑋於時倫貞搢超於門友溫良沖挹在家必聞本州禮命主簿不就三辟別駕從事史正式當朝靖拱端右仁薦顯於朝野清名扇於遐邇舉義熙十年秀才除郎中□□西鎮遷

南蠻府行叅軍除試守建寧太守剖符本邦衣錦晝遊
民歌其德士詠其風於是貫伍廊朝本州司馬長史而
君素懷慷慨志存遠御萬里歸闕除散騎侍郎進無休
容退無愠色忠誠簡於帝心芳風宣於天邑除龍驤將
軍試守晉寧太守輶車越斧金章紫綬棨戟幢幟襲封
邛都縣侯歲在壬申百六邁疊州土擾亂東西二境凶
豎狼暴緬戎寇場君收合精銳五丁之衆身伉矢石口
口千計肅清邊隅君南中磐石人情歸望遷本號龍驤
將軍護鎮蠻校尉寧州刺史邛都縣侯君姿瑛雄之高
畧敦純懿之弘度獨步南境卓爾不羣雖子產之在鄭

篋以加焉是以蘭聲旣暢福隆後嗣者矣自非愷悌君子孰能若斯也哉昊天不弔寢疾彌篤享年六十一歲在丙戌十二月上旬薨黎庶痛悼宋夷傷懷天朝遠感追贈中牢之饋也故吏建寧趙次之巴郡杜長子等仰襄仁德永慕玄澤刊石樹碑褒尙休烈其頌曰

巍巍靈山峻高迢遰或躍在荆龍飛紫闥邈邈君侯天姿瑛哲縉紳踵門揚名四外束帛淺淺禮聘交會優遊南境恩沾口衷撫伺方岳勝殘去殺悠哉明后德重道融綢繆七經騫騫遶躬鳳翔京邑曾口比蹤如何不弔遇此繁霜良木摧枯光輝潛藏在三感慕孝友哀傷銘

通玄石千載垂功

祖已薨背考忠存銘記良願不遂奄然早終嗣孫碩子
等及平哀感仰尋□訓永慕高蹤控勒在三仲秋七日
登山築石樹立玄碑表書勲於當世流芳風於千代故
記之

寧州長子驍弘早終次弟驍紹次弟驍暄次弟驍崇等
建樹此碑

大明二年歲在戊戌九月上旬壬子□嗣孫□□□□
碩□碩萬碩思碩□碩羅碩□碩俗等立

近碑府主簿益州杜長子

文建寧縣道慶作

府長史建寧縣道文

司馬建寧縣德□

錄事參軍武昌郡劉覲

功曹參軍建寧孟□倫

倉曹參軍建寧縣□□

戶曹參軍建寧周賢

中兵參軍鴈門郡王□

複案右七人上列前排

府功曹建寧縣□

主簿建寧趙道生

右二人上列中排

別駕建寧縣敬祖

治中晉寧趙世伐

主簿建寧縣德□

主簿建寧孟叔明

西曹益寧楊琮子

西曹晉寧路雄

右六人上列後排

鎮蠻長史建寧縣世明

司馬建寧縣□□

錄事叅軍建寧毛瑋子

功曹叅軍□□李融之

倉曹叅軍牂柯謝國子

戶曹叅軍南廣楊道育

中兵叅軍建寧縣孫記

右中列前排

蠻府功曹建寧李□祖

主簿建寧孟令孫

主簿建寧孟順德

右中列中排

門下建寧縣連□

錄事弋陽郡舒仁

西曹建寧周令活

戶曹建寧陳世敬

省事安陽□雅□

書佐建寧孟羅

幹張孫明

右中列後排

錄事孟林

西曹劉道善

戶曹尹仲□

記室張叔□

朝直張世保

□下都督王道盈

□□尹頭

□□□文

□□康

右下列前排

門下張尋

錄事萬敬

西曹尹開

戶曹來叔子

省事李道學

書佐單仲

幹盛慶子

右下列後排

右宋故龍驤將軍護鎮蠻校尉寧州刺史邛都縣侯肅
使君之碑在陸涼州蔡家堡肅君墓前碑高丈餘有穿
有陰額在穿上大明二年故吏趙次之杜長子等所立

文爲縣道慶作正書兼用隸法饒有樸散之趣縣君名
龍顏字仕德建寧同樂州人近祖肅仕魏爲尙書僕射
河南尹君於晉義熙十年舉秀才除郎中遷南蠻府叅
軍試守建寧太守遷本號龍驤將軍護鎮蠻校尉寧州
刺史邛都縣侯卒於丙戌案縣本蠻夷唐書所稱東爨
烏蠻西爨白蠻是也碑敘世系遠舉楚之子文漢之班
固風俗通云班姓楚令尹闢班之後案班爲子文之子
左傳作般猶公輸般亦作班碑雖傳會亦有典據縣氏
見於載記者華陽國志昌寧大姓有縣習蜀志建寧大
姓有交州刺史縣深梁武帝以縣瓚爲寧州刺史瓚有

二子曰震曰翫隋開皇十七年翫反史萬歲征討請降
明年入朝被戮其子弘達唐武德中爲昆州刺史南詔
碑有南寧州都督蘇歸王昆州刺史蘇日進梨州刺史
蘇祺螺山大鬼主蘇彥昌南寧州大鬼主蘇崇道至後
晉有蘇判借與段思平兵以敗楊干貞是蘇氏自魏歷
十數代未衰也故謂之大姓碑中多假借及別體字如
紹蹤作紹縱鉞斧作越斧簪纓作振纓九列作九例采
石作菜石幢蓋作幢檻班作斑匪作逕淵作淵匠作近
驂作驂爨作爨兩顯字並作顯集古錄云漢綏民校尉
熊君碑其書顯字皆爲顯莫曉其義馥案濕水禹貢孟

子漢書地理志並作潔字蓋隸變𩇑爲累也諡從益不從益與魯俊碑同戴侗曰唐本說文有諡無諡是從益爲正體可證徐本說文之誤碑陰幹卽幹字漢碑陰亦有洪氏隸續言之詳矣其頌以闡哲殺與還外會裏爲韻案殺廣韻音所界切禮器不豐不殺卽此音曹植黃帝贊以哲韻制王粲詠以闡韻又是也又以霜藏傷與融躬蹤功爲韻案東方朔七諫以當韻功陳琳大荒賦以遑韻躬陸雲陸府君詠以章韻蹤可爲比照也

南詔德化碑

恭聞清濁初分運陰陽而生萬物川嶽旣別樹元首而

定八方故知懸象著明莫大於日月崇高辨位莫大於
君臣道治則中外寧政乖必風雅變豈世情而致抑天
理之常我贊普鍾蒙國大詔性業合道智覩未萌隨世
運機觀宜撫衆退不負德進不慚容者也王姓蒙字閣
羅鳳大唐特進雲南王越國公開府儀同三司之長子
也應靈傑秀含章挺生日角標奇龍文表貴始乎王在
儲府道隆三善位卽重離不讀非聖之書嘗學字人之
術撫軍屢聞成績監國每著家聲唐朝授右領軍衛大
將軍兼陽爪州刺史洎先詔與御史嚴正誨謀靜邊寇
先王統軍打石橋城差詔與嚴正誨攻石和子父子分

師兩殄克醜加左領軍衛大將軍無何又與中使王承
訓同破劍川忠績載揚賞延於嗣遷左金吾衛大將軍
而官以材遷功由幹立朝廷照鑒委任兵權尋拜特進
都知兵馬大將軍二河旣宅五詔已平南國止戈北朝
分政而越析詔餘孽于贈恃鐸稍驕瀘江結彼克渠擾
邊鄙飛書遣將皆輒拒違詔弱冠之年已負英斷恨茲
殘醜敢逆大命固請自征志在掃平梟于贈之頭傾伏
藏之穴鐸稍盡獲寶物並歸解君父之憂靜邊隅之擾
制使奏聞酬上柱國天寶七載先王卽世皇上念功旌
孝悼往撫存遣中使黎敬義持節冊襲雲南王長男鳳

迦異時年十歲以天寶入朝授鴻臚少卿因冊襲次又
加授上卿兼陽瓜州刺史都知兵馬大將既啣厚眷思
竭忠誠子弟朝不絕書進獻府無餘月將謂君臣一德
內外無欺豈期奸佞亂常撫虐生變初節度章仇兼瓊
不量成敗妄奏是非遣越雋都督竹靈倩置府東爨通
路安南賦重役繁政苛人弊被南寧州都督爨歸王昆
州刺史爨日進梨州刺史爨祺求州爨守懿螺山大鬼
主爨彥昌南寧州大鬼主爨崇道等陷殺竹靈倩兼破
安寧天恩降中使孫希莊御史韓洽都督李宓等委先
詔招討諸爨畏威懷德再置安寧其李宓忘國家大計

躡章仇詭蹤務求進官榮宓阻扇東爨遂激崇道令殺
歸王議者紛紜人各有志王務遏亂萌思紹先績乃命
大軍將段忠國等與中使黎敬義都督李宓又赴安寧
再和諸爨而李宓矯僞居心尙行反間更令崇道謀殺
日進東爨諸酋並皆驚恐曰歸王崇道叔也日進弟也
信彼讒構殺戮至親骨肉旣自相屠天地之所不祐乃
各興師召我同討李宓外形中正佯假我郡兵內蘊奸
欺妄陳我違背賴節度郭虛已仁鑒方表我無辜李宓
尋被貶流崇道因而亡潰又越嶲都督張虔陀嘗任雲
南別駕以其舊識風宜表奏請爲都督而反誑惑中禁

職起亂階吐蕃是漢積讐遂與陰謀擬共滅我一也誠
節王之庶弟以其不忠不孝貶在長沙而彼奏歸擬令
間我二也崇道蔑盟構逆罪合誅夷而卻收錄與宿欲
令讐我三也應與我惡者並授官榮與我好者咸遭抑
屈務在下我四也築城收質繕甲練兵密欲襲我五也
重科白直倍稅軍糧徵求無度務欲敝我六也於時馳
表上陳縷伸冤枉皇上照察降中使賈竒俊詳覆屬豎
臣無政事以賄成一信虔陀共掩天聽惡奏我將叛王
乃仰天嘆曰嗟我無事上蒼可鑒九重天子難承咫尺
之顏萬里忠臣豈受奸邪之害卽差軍將楊羅顛等連

表控告豈謂天高聽遠蠅點成瑕雖布腹心不蒙矜察
管內酋渠等皆曰主辱臣死我實當之自可齊心戮力
致命全人安得知難不防坐招傾敗於此差大將軍王
毗雙羅時等揚兵送檄問罪府城自秋畢冬故延時序
尙佇王命冀雪事由豈意節度使鮮于仲通已統大軍
取南谿路下大將軍李暉從會同路進安南都督王知
進自步頭路入旣數道合勢不可守株乃宣號令誠師
徒四面攻圍三軍齊奮先靈冥祐神炬助威天人協心
軍羣全拔虔陀飲酖寮庶出走王以爲惡止虔陀罪豈
加衆舉城移置猶爲後圖卽就安寧再申衷懇城使王

克昭執惑昧權繼違拒請遣大軍將李克鐸等帥師代之我直彼曲城破將亡而仲通大軍已至曲靖又差首領楊子芬與雲南錄事參軍姜如之齎狀披往因張卿譏構遂令蕃漢生猜贊晉今見觀釁浪穹或以衆相威或以利相導倘若蚌鷸交守恐爲漁父所擒伏乞居存見亡在得思失府城復置幸容自新仲通殊不招承刼至江口我又切陳丹欸至於再三仲通拂諫棄親阻兵安忍吐發唯言屠戮行使皆被詆呵仍前差將軍王天運帥領驍雄自點蒼山西欲腹背交襲於是具牲牢設壇墀叩頭流血曰我自古及今爲漢不侵不叛之臣今

節度背好貪功欲致無上無君之討敢昭告於皇天后
土史祝盡詞東北稽首舉國痛切山川黯然而誠感神
風雨震霈遂宣言曰彼若納我猶吾君也今不我納卽
吾讐也斷軍之機疑事之賊乃召卒伍擱然登陴謂左
右曰夫至忠不可以無主至孝不可以無家卽差首領
楊利等於浪穹參吐蕃御史論若贊御史通變察情分
師入救時中丞大軍出陳江口王審孤虛觀向背縱兵
親擊大敗彼師因命長男鳳迦異大軍將段全葛等於
上遷和拒山後贊軍王天運懸首轅門中丞逃師夜遁
軍吏欲追之詔曰止君子不欲多上人况敢凌天子乎

苟自救也社稷無隕多矣旣而合謀曰小能勝大禍之
胎親仁善鄰國之寶遂遣男鐸傳舊大酋望趙佗鄧楊
傳磨侔及子弟六十人齎重帛珍寶等物西朝獻凱屬
贊普仁明重酬我勲效賜爲兄弟之國天寶十一載正
月一日於鄧川冊詔爲贊普鍾南國大詔授長男鳳迦
異大瑟瑟告身都知兵馬大將凡在官僚寵幸咸被山
河約誓永固維城改年爲贊普鍾元年二年漢帝又命
漢中郡太守司空襲禮內使賈竒俊帥師再置姚府以
將軍賈瓘爲都督僉曰漢不務德而以力爭若不速除
恐爲後患遂差軍將王兵各絕其糧道又差大軍將洪

光乘等神州都知兵馬使論綺里徐同圍府城信宿未
踰破如拉朽賈瓏面縛士卒全驅三年漢又命前雲南
郡都督兼侍御使廣府節度何履光中使薩道懸遜摠
秦隴英豪兼安南子弟頓營隴坪廣布軍威乃舟楫備
修擬水陸俱進遂令軍將王樂寬等潛軍襲造船之師
伏屍遍毘舍之野李宓猶不量力進逼遼川時辰州都
知兵馬使論綺里徐來救已至巴驕山我命大軍將段
附克等內外相應競角競衝彼弓不暇張乃不及發白
日晦景紅塵翳天流血成川積屍壅水三軍潰衄元帥
沈江詔曰生雖禍之始死乃怨之終豈顧前非而忘大

禮遂收亡將等屍祭而葬之以存恩舊五年范陽節度
安祿山竊據河洛開元帝出居江劍贊普差御史贊郎
羅于恙結齋勅書曰樹德務滋長去惡務除本越嚮會
同謀多在我圖之此爲美也詔恭承上命卽遣大軍將
洪光乘杜羅盛段附克趙附于望羅遷王遷羅奉清平
官趙佺鄧等統紂于藩從昆明路及宰相倚祥葉樂節
度尙儉贊同伐越嚮詔親率太子潘圍逼會同越嚮固
拒被僂會同請降無害子女玉帛百里塞途牛羊積儲
一月館穀六月漢復置越嚮以楊庭璉爲都督兼固臺
登贊普使來曰漢令更置越嚮作援昆明若不再除恐

成滋蔓旣舉奉明旨乃遣長男鳳迦異駐軍瀘水權事
制宜令大軍將楊傳磨侔等與軍將欺急歷如數道齊
入越巂再掃臺登滌除都督見擒兵士盡擄於是揚兵
邛部而漢將大奔回旆昆明傾城稽顙可謂紹家繼業
世不乏賢昔十萬橫行七擒縱畧未足多也爰有尋傳
疇壤沃饒人物殷湊南通渤海西近大秦開闢以來聲
教所不及義皇之後兵甲所不加詔欲革之以衣冠化
之以禮義十一年冬親與僚佐兼總師徒刊木通道造
舟爲梁耀以威武喻以文辭欵降者撫慰安居抵捍者
繫頸盈貫矜愚解縛擇勝置城裸形不討自來祁鮮望

風而至且安寧雄鎮諸巘要衡山對碧雞波還碣石鹽池執掌利及牂牁城邑綿延勢連戎熒乃置城監用輯攜離遠近因依閭閻櫛比十二年冬詔候隙省方觀俗恤隱次昆川審形勢言山河可以作藩屏川陸可以養人民十四年春命長男鳳迦異於昆川置柘東城居二詔佐鎮撫於是威懾步頭恩收曲靖頒告所及翕然俯從我王氣受中和德含覆育才出人右辨稱世雄高視則卓爾萬尋運籌則決勝千里觀釁而動因利興功事協神衷有如天啓故能攻城挫敵取勝如神以危易安轉禍爲福紹開祖業弘覃王猷坐南面以稱孤統東偏

而作主然後修文習武官設百司列尊敘卑位分九等
闡三教賓四門陰陽敘而日月不愆賞罰明而奸邪屏
迹通三才而制禮用六府以經邦信及豚魚恩霑草木
庀塞流潦高原爲稻黍之田䟽決陂沱下隰樹園林之
業易貧成富徙有之無家饒五畝之桑國貯九年之廩
蕩滅之恩累占蠱動珍帛之惠徧及耆年設險防非憑
隘起堅城之固靈津蠲疾重巖湧湯沐之泉越賤天馬
生郊大利流波濯錦西開尋傳祿郛出麗水之金北接
陽山會川收瑟瑟之寶南荒濟奏覆詔願爲外臣東爨
悉歸步頭已成內景建都鎮塞銀生於墨黻之鄉候隙

省方駕憩於洞庭之野盖由人傑地靈物華氣秀者也
於是犀象珍奇貢獻畢至東西南北烟塵不飛遐邇無
剽掠之虞黔首有鼓擊之泰乃能驤首邛南平眸海表
豈惟我鍾王之自致實賴我聖神天地贊普德被無垠
威加有截春雲布而萬物普潤霜風下而四海颯秋故
能取亂攻昧定京邑以息民兼弱侮亾冊漢帝而繼好
紀功述績實曰鴻徽自顧下才敢題風烈其詞曰
降祉自天福流後孕瑞應匪虛禎祥必信聖主分憂遐
荒聲振襲久傳封受苻兼印兼瓊秉節貪榮構亂開路
安南攻殘西蠻竹倩見屠官師潰散賴我先王懷柔伏

叛祚不乏賢先猷是繼郡守詭隨貶神遐裔禍建虔陀
亂深豎壁殃咎匪他塗豕自殪仲通制節不詢長久徵
兵海隅頓營江口矢心不納白刃相守謀用不臧逃師
夜走漢不務德而以力爭興師命將置府層城三軍往
討一舉而平面縛羣吏馳獻天庭李宓總戎猶尋覆轍
水戰陸攻援孤糧絕勢屈謀窮軍殘身滅祭而葬之情
繇故設贊普仁明審知機變漢德方衰邊城絕援揮我
兵戎攻彼郡縣越嶲有征會同無戰雄雄嫡嗣高名英
烈惟孝惟忠乃明乃哲邛瀘一掃軍群雙滅觀兵尋傳
舉國來賓巡幸東轡懷德歸仁碧海效祉金穴薦珍人

無常主惟賢實親土宇克開煙塵載寢轂擊犁坑輯熙
群品出入連城光楊衣錦業留萬代之臺倉貯九年之
廩明明贊普揚于之光赫赫我王實賴之昌化及有土
美著無疆河帶山礪地久天長辨稱世雄才出人右信
及豚魚潤深瓊玖德以建功是謂不朽石以刊銘可長
可久

碑在大理府城南太和邨卽南詔大和城北門舊址仆
地漫滅俗呼摩刀石乾隆五十三年布政使王景訪得
之今就通志府志參錄其文如右通志稱鄭回撰杜光
庭書案通鑑雲南王閣羅鳳陷嵩州獲西瀘令鄭回回

相州人通經術閤羅鳳愛重之志稱光庭以文學教蒙氏既卒蒙學士爨泰葬於玉局峰麓案點蒼山十九峰玉局其一也碑言天寶七載先王卽世皇上遣中使黎敬義持節冊襲雲南王長男鳳迦異時年十歲以天寶入朝授鴻臚少卿因冊襲次又加授上卿兼陽瓜州刺史唐書南詔傳天寶初遣閤羅鳳子鳳迦異入宿衛拜鴻臚卿七載歸義死閤羅鳳立襲王以其子鳳迦異爲陽瓜州刺史案天寶七載詔改魏州爲陽瓜州以鳳迦異爲刺史其先世邏盛曾爲魏州刺史魏州卽今之蒙化南有巍山州因山得名碑言越析詔恃鐸稍云云案

南詔傳鐸稍者狀如殘乃有孔旁達出麗水飾以金所
擊無不洞夷人寶貴月以血祭之又云越析詔酋長烝
其王波衝妻因殺波衝波衝兄子于贈持王所寶鐸稍
邑於龍佉河使部酋楊墮居河東北歸義樹壁侵于贈
不克閣羅鳳自請往擊楊墮破之于贈投瀘死得鐸稍
故王出軍必雙執之碑言章仇兼瓊遣越嶲都督竹靈
倩置府東爨被南寧州都督爨歸王昆州刺史爨日進
黎州刺史爨祺求州刺史爨守懿螺山大鬼主爨彥昌
南寧州大鬼主爨崇道等陷殺靈倩兼破安寧委先詔
招討再置安寧案驃國傳爨弘達旣死以爨歸王爲南

寧州都督大鬼主崇道者與弟日進日用居安寧城左
聞章仇兼瓊開步頭路築安寧城群蠻震騷共殺築城
使者玄宗詔蒙歸義討之師次波州歸王及崇道兄弟
謝罪赦之案築城使者卽竹靈倩史畧其名夷人尙鬼
謂主祭者爲鬼主大部落有大鬼主也碑言李宓激崇
道令殺歸王更謀殺日進東爨諸酋乃各與師召我同
討又云李宓尋被貶流崇道因而亡潰案驃國傳崇道
殺日進及歸王歸王妻阿妊烏蠻女也訴歸義爲興師
崇道走黎州俄亦被殺碑稱贊普仁明賜爲兄弟之國
冊詔爲贊普鍾案吐蕃俗謂彊雄曰贊丈夫曰普故號

君長曰贊普夷言謂弟曰鍾吐蕃以弟蓄之也碑言授
長男鳳迦異大瑟瑟告身案吐蕃傳其官之章飾最上
瑟瑟金次之金涂銀又次之銀次之最下至銅止差大
小綴臂前以辨貴賤又于闐傳德宗遣朱如玉求玉於
于闐得瑟瑟百斤康者傳柘析城西南有藥殺水入中
國謂之珍珠河東南有大山生瑟瑟拂菻傳其國以瑟
瑟爲殿柱是也碑言遂收亡將等屍祭而葬之謂李宓
戰歿之兵唐書以爲鮮于仲通兵敗閣羅鳳斂戰酋築
京觀誤也碑言設險防非惡盜起堅城之固謂築龍首
龍尾二關也又言靈津蠲疾重巖湧湯沐之泉謂鄧川

出溫泉也唐書言天寶九載雲南蠻陷雲南郡都督張
虔陀死之卽碑所云虔陀飲酖也唐書言領劔南節度
使鮮于仲通自將進次曲州靖州閣羅鳳遣使者謝罪
願所虜得自新且城姚州如不聽則歸命吐蕃仲通怒
囚使者卽碑所云仲通大軍已至曲靖又云府城復置
幸容自新又云切陳丹欵至於再三仲通吐發唯言屠
戮行使皆被詆呵也唐書言劔南節度使鮮于仲通及
雲南蠻戰于西洱河大敗績大將王天運死之卽碑所
云王天運懸首轅門中丞逃師夜遁也唐書言劔南節
度畱後李宓及雲南蠻戰於西洱河死之卽碑所云三

軍潰衄元帥沈江也唐書言廣德初鳳迦異築柘東城
卽碑命長男鳳迦異於昆川置柘東城也唐書言祁鮮
山之西多瘴歊卽碑祁鮮望風而至也唐書言越睽之
西產善馬世稱越睽駿卽碑越睽天馬生郊也唐書言
麗水多金赭卽碑西開尋傳祿鄆出麗水之金也唐書
言尋傳西有裸蠻卽碑爰有尋傳疇壤沃饒又云裸形
不討自來也唐書言自彌鹿升麻二川南至步頭謂之
東爨烏蠻卽碑東爨悉歸步頭已成內景也唐書言會
安祿山反閣羅鳳因之取禱州會同軍卽碑所云詔親
率太子潘園逼會同越禱固拒被僂會同請降無害也

碑言列尊敘卑位分九等案九等謂九爽幕爽主兵琮
爽主戶籍慈爽主禮罰爽主刑勸爽主官人厥爽主工
館萬爽主財用引爽主客禾爽主商賈皆清平官兼之
清平猶宰相爽猶省也碑言凡在官僚寵幸咸被卽碑
陰所列段忠國等受吐蕃封賞者忠國本名儉魏以戰
功封清平官賜名忠國碑陰亦多漫滅今不載

唐書玄宗紀天寶九載雲南蠻陷雲南郡都督張虔陀
死之十載四月壬午劔南節度鮮于仲通及雲南蠻戰
於西洱河大敗績大將王天運死之陷雲南都護府十
三載劔南節度畱後李宓及雲南蠻戰於西洱河死之

楊國忠傳南詔質子閣羅鳳亡去帝欲討之國忠薦鮮
于仲通爲蜀郡長史率兵六萬討之戰瀘川舉軍歿獨
仲通挺身免時國忠兼兵部侍郎素德仲通爲匿其敗
更敘戰功使白衣領職又云尋遣劔南畱後李宓率兵
十餘萬擊閣羅鳳敗死西洱河國忠矯爲捷書上聞自
再興師傾中國驍卒二十萬踣屨無遺天下冤之

南詔傳開元末皮羅閣逐西洱河蠻取大和城詔賜名
歸義冊爲雲南王於是徙至大和城天寶初遣閣羅鳳
子鳳迦異入宿衛拜鴻臚卿七載歸義死閣羅鳳立襲
王以其子鳳迦異爲陽瓜州刺史初安寧城有五鹽井

人得煮鬻自給玄宗詔特進何履光以兵定南詔境取
安寧城及井故事南詔嘗與妻子謁都督過雲南太守
張虔陀私之多所求丐閣羅鳳不應虔陀陰表其罪由
是忿怨反發兵攻虔陀殺之取姚州及小夷州三十二
明年領劔南節度使鮮于仲通自將出戎嶠州分二道
進次曲州靖州閣羅鳳遣使者謝罪願還所虜得自新
且城姚州如不聽則歸命吐蕃恐雲南非唐有仲通怒
囚使者進薄白崖城大敗引還閣羅鳳斂戰皆築京觀
遂北臣吐蕃以爲弟夷謂弟曰鍾故稱贊普鍾給金印
號東帝揭碑國門明不得已而叛嘗曰我上世世奉中

國累封賞後嗣容歸之若唐使者至可指碑澡祓吾罪
也楊國忠使侍御史李宓討之敗於大和城死者十八
會安祿山反閣羅鳳因之取嶺州會同軍據清溪關以
破越析臯于贈西而降尋傳驃諸國案驃國古朱波也
在永昌南二千哩
吐蕃傳天寶十載吐蕃與蠻閣羅鳳聯兵攻瀘南劔南
節度使楊國忠方以姦罔上自言破蠻衆六萬於雲南
通鑑李泌曰雲南自漢以來臣屬中國楊國忠無故擾
之使叛臣於吐蕃苦於吐蕃賦役重未嘗一日不思復
爲唐臣也

郵亭題壁詩

明洪武中閩中守某妻宋氏謫戍永昌賦詩題郵亭壁
嘉靖十六年御史陰汝登祠而祀之御史黃中刻詩於
石今讀其詩詞意率直音節悲涼有古樂府之風惜刻
石遠在邊徼流傳絕少余見而亟錄之

郵亭咫尺堪投宿手握親姑憇茅屋抱薪就地旋鋪攤
支頤相向吞聲哭旁人問我是何方俛首哀哀訴衷曲
妾家祖居金華府祖父曾爲上千戶舉艘運粟大都回
金牌勅賜雙飛虎弟兄晦迹隱山林甘學崇文不崇武
方金玉堂宋學士亦與妾家同一譜笄年嫁向衢州城
夫婿好學明詩經離騷子史遍搜覽意欲出仕蘇蒼生

前年郡邑忽交辟辭親笑傲趨神京萬言長策獻闕闔
馳書歸報泥金名承恩拜除閬州守飄然畫舫西南行
到官搜賢訪遺老要把姦頑盡除掃日則升堂剖公務
夜則挑燈理文彙守廉不使纖塵污執法應教僚佐怒
府推獲罪苦相扳察院來提誰與訴臨行囊橐無錙銖
惟有舊日將去書牽衣父老泣相送遮留赤子爭號呼
彼時徵贓動盈萬妾夫自料無從辨竟晨拷打不成招
暗囑家人莫送飯嗟呼餓死囹圄中旗軍原籍來抄封
當時指望耀門戶豈期一旦翻成空親隣憐妾貧如洗
斂錢殷勤餽行李伶仃三口到京師奉旨邊方戍金齒

阿弟遠餞龍江邊臨歧抱頭哭向天姊南弟北兩相慟
別來再會知何年開船未幾子病倒求醫問卜皆難保
武昌城外埜坡前白骨誰憐葬青草初然有子相依傍
身安且不憂家蕩而今子死姑年高縱到雲南有誰望
八月官船渡常德促裝登程戒行色空林日暮鷓鴣啼
聲聲叫道行不得上山險如登天梯百戶發放來取齊
雨晴泥滑把姑手一步一仆身沾泥晚來走向營中宿
情思昏昏倦無力五更睡重起身遲飯還未熟旗頭逼
翻思昔日深閨內遠行不出中門外融融日影上欄干
花落庭前鳥聲碎寶髻斜簪金鳳翹翠雲蟬鬢蛾眉嬌

繡牀新刺雙蝴蝶久坐尙覺春風饒誰知今日夫亡後
天末遐荒要親走半途日午姑云饑欲丐奉姑羞舉口
同來一婦天台人情懷薄似秋空雲喪夫未經二十日
畫眉重嫁鹽商君血色紅裙繡羅襖騎驢遠涉長安道
穩坐不知行路難揚鞭笑指青山小取歡但感新人心
那憶舊夫恩愛深吁嗟風俗日頹敗綱常廢盡趨黃金
妾心汪汪淡如水寧受飢寒不受恥幾回欲葬江魚腹
姑存未敢先求死前途姑身少康健辛苦奉姑終不怨
姑亡妾亦隨姑亡地下何慚見夫面說到傷心淚如雨
咽咽低頭不能語道傍聞者總悽酸隔岸猿啼叫何許

惡俗

雲南之俗人頭畜鳴難以理格惟嚴刑竣法可使其畏威而不敢動前者楚雄大理永昌三府亂民蠶起蟻聚圍城邑毀廬舍抉人目焚人身官府力不能制其不釀成大事者萬萬幸此其舊俗相沿非一朝夕之故也欲革其弊先禁牛叢所謂牛叢者連山接寨約結黨與於深林孤廟殺牛飲血相爲盟誓一人欲動則登高吹角角聲一起千百雲集擁其衆以報復私怨挾制官長莫敢誰何此俗豈可容於

聖明之世試取牛叢之首殺無赦取吹角者殺無赦則

破其膽敗其謀絕其盟散其衆而俗一變矣

用刑

省刑薄斂理民要道人皆習知若夫因地制宜或輕或重則又在執政者裁之雲南山多於地民無儲畜其斂視他省宜更薄而刑則斷不可輕雲南舊染蠻夷之習視禮法若土苴仰刑法如雷霆布德未見其懷也示威猶見其畏也則刑爲祛疾之藥石矣昔子產治鄭鑄刑書作丘甲我夫子稱之一則曰惠人再則曰遺愛又曰孰謂子產不仁吾不信也若與其行事不相符者及聞火烈水弱之言然後知惠愛仁卽寓於刑法之內執滇

政而事姑息邀名譽以陷民於法網者謂非滇民之賊耶謂非子產之罪人耶

宣十六年左傳善人在上則國無幸民諺曰民之多幸國之不幸也

援据宏富攷核精詳識解明通頭
頭是道無一語拾前人牙慧卯部
之至黃六經之羽翼也潛正而後
此爲嗣韻拜服拜服

愚弟葉紹奎拜讀

札樸第十

山陰 李信 校正

跋

歲甲子信自滇將束裝歸大令朱谷先生手所著札牒
十卷屬就江浙閒刻之曰滇南無工剗刷者願以付君
而先生以是年沕於官所信竭於資釜又遲之一年乃
果東歸每檢是書惴惴焉懼所諾之不踐也癸酉鮑先
生淶飲銳力專司校讐工資信勉力謀之而是刻乃韋
以成憶先生在滇政暇不廢著述信職在下僚謬蒙推
許往往引與談論連類引申互相商榷幾共忘其刻漏
之遙而燭之屢跋也昔人云得一知己足以不恨以信
之碌碌無似而先生有嗜痂之癖知遇之感安能去懷

心念舊情恍忽如昨今幸是刻之成不負先生付託之意至於書之質而雅也確而精也所見之不鑿也所言之不襲也世必有以賞之信敢阿其所好耶嘉慶癸酉仲夏後學山陰李宏信跋於吳門寓齋吳門聞詩書